

150
ЖАМБЫЛ

Мирзатай
Жандасбеков



Асыл сөздің
атасы

Мырзатай Жолдасбеков



АСЫЛ
СӨЗДІҢ
АТАСЫ

МЫРЗАТАЙ ЖОЛДАСБЕКОВ

**АСЫЛ СӨЗДІҢ АТАСЫ
ЗЕРТТЕУЛЕР**



АЛМАТЫ «БІЛІМ» 1996

Жолдасбеков М.

Ж 69 Асыл сөздің атасы: Зерттеулер.— Алматы: «Білім», 1996.—304 бет.

ISBN 5-7404-0193-3

Белгілі қоғам қайраткері, танымал әдебиетші М. Жолдасбековтың бұл кітабында XX ғасырдың Гомері атанған жүз жыл жырлаған жыр алыбы Жамбылдың қайталанбас шығармашылығы мен халқымыздың үшан-теңіз байлығы — поэзиямыздың кешегі, бүгінгі жүріп өткен жолына жан-жақты талдау жасалынған. Сондай-ақ мұнда Жәкеннің үстаздары мен тұстастары және шәкірттері хакында берілген аса құнды мағлұматтар да мол. Кітап жыр маржанын қадір тұтатын көлшілік қауымға арналған.

**Ж 4603020100—020
412(05)—96 қосым. шеш.—96**

ББК 83.3 Каз.

ISBN 5-7404-0193-3

© «Білім» баспасы, 1996

БАСТАУ

Қазақ халқының ақындық өнерінің даму тарихында Жамбыл Жабаевтың алатын орны айрықша зор. Жамбыл және қазіргі халық поэзиясы немесе Жамбылдың асқан ақындық өнері, оның тамыр тартқан тереңі мен даму, жалғасу жолдары — қазіргі әдебиеттану ғылымының үлкен де күрделі, маңызды да мәнді мәселелерінің бірі.

Қазақ халқының ұлы ақыны, жиырмасыншы ғасырдың Гомері, халық поэзиясының феномені атанған Жамбыл Жабаевтың шығармашылық ғұмырнамасы осы кезге дейін ғылыми тұрғыдан жан-жақты, толық зерттеле қойған жоқ. Әсіресе, осындай ірі тұлғалы, екі дәуірді басынан кешірген, замана шежіресіне айналған ақынның революцияға дейінгі өмірі мен ақындық қызметі бүгінгі күнге дейін арнайы іздестірілмеген, толықтырып, бір жүйеге келтірілмеген еді. Жамбыл жөнінде жазылып жүрген еңбектерде ақынның көбінесе, кенес дәуіріндегі, әсіресе, 30-40 жылдарғы жыраулық данқының бүкіл дүние жүзіне танылып шарықтаған шағы қамтылып, баспасөз бетінде кеңірек жазылды да, оның революцияға дейінгі өмірі, жастық шағы, ақындық ортасы, ұстаздары, сондай-ақ тұстастары және шәкірттері, қыскасы Жамбылдың ақындық дәстүрінің бастау алған негіздері, қалыптасуы мен өркен жайып, даму жолдары да, оның ғажайып ақындық шеберлігінің сырлары да толық ашылмай келеді. Бұл жөніндегі еңбектерден С. Бегалин, Ә. Тәжібаев, М. Ритман-Фетисов бірлесіп жазған Жамбылдың өмірбаяны жайлы очеркі, Е. Ысмайылов, К. Зелинский кітаптарын, Ә. Байтанаев, Қ. Тұрғанбаев, Қ. Бейсембиевтің кандидаттық диссертацияларын, тағы басқа бірқатар еңбектерді атар едік.

Бұдан кейінгі жылдары Қазақ ССР Ғылым академиясы М. О. Әуезов атындағы әдебиет және өнер институты қызметкерлері әзірлеген «Жамбыл және қазіргі халық поэзиясы», «Жамбыл Жабаев творчествосы» атты қос жинақты және «Жамбыл және қазіргі халық поэзия-

сы» атты зерттеу, Н. Төрекұлов, С. Садырбаев, К. Жұмаділов, тагы басқалар жазған кітаптар мен құрастырылған естелік жинақтарын қосуға болар еді.

Халық таланттарын, олардың асыл мұраларын қастерлеп халық игілігіне айналдырамыз, зерттейміз десек, Жамбыл жайлы айтылар сөз әлі де аз емес, жинақталған қыруар материалдарды жүйелеп, сарапап, тереңірек зерттейтін мезгіл жетті.

Жамбыл жайында бір ауыз сөз айтып, мақала жазбаған әдебиетші кемде-кем. Соған қарамастан ақын мұрасы әлі толық зерттеліп болған жок. Жамбылдың ғылыми өмірбаяны әлі жазылған емес, ақындық ортасы толық ашылмай отыр, ақындық шеберлігі де арнайы қарастыруды қажет етеді. Осы үш мәселе шешілгенде ғана, ұлы ақынның мұрасы дұрыс және тұтастай танылатын болады. Еңбектің басты мақсаты — осындай қүрделі әдеби құбылысты жан-жакты тану.

Жамбылдың шығармашылық өмірінің 75 жылдығы тұсында К. Алтайский жасаған анкеталық 56 сұрак-жап негізінде ақын өмірбаянының алғашқы жазбаша нұсқасы жасалды. Мұның өзінде де революцияға дейінгі кезеңі өте мардымсыз қамтылған еді. Жамбылдың революцияға дейінгі өмір жолы туралы тың дерек, жаңа хабар табу мүлде қын екендігі сөзсіз. Ақын өмірбаянын толықтырып, оның ғылыми нұсқасын жасауда өнерпаздар мен көнекөз қариялардың, білімпаздардың Жамбылдың өзінен, ел арасынан естіген, білген деректері айтарлықтай септігін тигізді. Ақынның кейбір шығармаларының тарихына байланысты ел жадында сакталған, қағазға түскен хабарлардың да маңызы жоғары. Жамбылдың 25 пен 60 жас аралығында шығарған, одан беріде халық өнерпаздары арқылы бізге дейін жеткен туындылары мен олардың шығу тарихы жайында ел арасында сакталған әңгімелерді өзара сабактас және басқа белгілі материалдармен байланыста алып пайымдау ақын өмірінің кейбір мезеттерінің, кезеңдерінің шындығын тануда үлкен қызмет атқарды.

Жамбыл творчествосымен, оның ақындық құдіреті мен мектебін зерттеу мәселесімен ширек ғасырдай үздіксіз айналысып келе жатқаным оқырман қауымға мәлім фой деп ойлаймын. Мен ұзак жылдар ел аралап, Жамбылды көрген, оның ұстаздарын, Жамбылдың алдында өмір сүрген ақын-жырауларды, шешендерді, күйші-өнерпаздарды білетін, көкірегі жазулы хаттай зерделі ақсалдармен, халық таланттарымен, карт ақындармен кез-

десіп, хат арқылы хабарласып, құнды материалдар жинағанымызды еске сала кеткіміз келеді. Аса құнды деректердің көбін біз Жамбылдың шәкірті, айнымас серігі Кенен Әзірбаевтан алдық.

Атақты Сауытбектің жиені Смайыл Калипанов маған жолдаған бір хатында былай деп жазады:

Жүрсіндер білім жинап Алматыда,
Қартайып тұрған шалмыз жар басында,
Қолымда бабалардың мұрасы бар,
Көміліп топыракта қалмасын да.
Қылышын өтп кетті білениң өнер,
Мойынқұм, Қордай, Шудың арасында,
Өзіңе бәрін тегіс тапсырайын,
Ішнен жараганын аласың да.

Біз Смайыл аксакалдан Сауытбектің мұрасын толығырақ, Қылышбай, Балқыбек, Мырзабай, Орақбай ақындардың шығармаларын, Куандық пен Сарбастың үзак айтысын жазып алған едік.

Жамбыл облысы Луговой ауданынан карт ақын Қазыбай Бижанов пен Шу бойындағы Асылбеков Сауран аксакал да Балқыбектің, Орақбайдың, Әзбектің, Бармақтың творчествосынан құнды деректер жіберген еді.

Кордайлық карт шежіре Өмірқұл Құлшықов пен әдебиет пәнінің мұғалімі Жақып Әбдірахманов Әтеген батырдың өмірінен; Тілеміс, Әлмейін ақындардың шығармашылығынан, меркілік карт ақын Өмірбек Қабылов Сүйінбай, Майкөт, Мырзабай, Әзбек, Жидебай ақындардың мұрасынан құнды мәліметтер берген болатын. Олардың біразы бүгінде арамызда жок. Соншама қымбат қазына сактап, бізге жеткізген зерделі, ескерулі азаматтарға алғыс айтуды, дүние салған қадірлі аксакалдардың аруағы алдында бас июді өзімізге борыш санаймыз.

Жамбыл алдымен халық жырауларынан үйренген, ел өнерінің қайнар қозінен, мөлдір тасқынынан туған, сол өнердің бөлеуінде өскен. Жамбылдың үлгі-өнеге алған мектебі — Сүйінбай, Қабан, Шөже, Майкөт, Жанак, Тубек, Майлықожа, Құлыншак, Бақтыбай, Куандық тәрізді іргелі ақындар; Кебекбай, Ноғайбай, Сапак, Бөлтіріктердей от ауызды, айыр көмей шешендер, Қанадай, Байсеркедей өнері аскан күйшілер. Бұған Жамбылдың ақындығын өзімен сайыса жүріп шындаған: Құлмамбет, Сарбас, Шашубай, Айкүміс, Досмағамбеттердей өрелі ақындарды, кезінде жиын-тойда бас қосқан, үзенгілес, Әсет, Жүсілбек кожа, Тілеміс, Әлмейін, Әлмен, Ләтипа, Балқыбек, Мырзабай, Әзбек, Шарғын, Қарабек ақын-

дарды, Жолдыбай, Жантай күйшілерді, Қосай шешенді, шәкірттері Мақыш, Шүкітай, Элекең, Бармак, Қенен, Үмбетәлі, Өтеп, Саяділ, Құстутін, Әмірзак, Құрама, Әбдіғали, Жартыбай ақындарды коссак, академик М. Әуезовтің: «Жамбылдың өз айналасына келгенде, қоюланған қалың үйір, үлкен шоғыр, ордалы өленді көруге болады» деген сөзі толық расталады.

Міне, осы аталған қалың, іргелі ақынның көбінің шығармашылығы әлі зерттелген жок. Біздің кітабымыздың Қабан, Сүйінбай, Майкөт, Куандық, Құлмамбет, Сарбас, Орақбай, Сауытбек ақындардың өмірінен, шығармашылығынан берілген жаңа деректер сол кемшіліктің аз да болса орнын толтырар деген үміттеміз. Жамбыл бұлардың біразынан үйренген, біразымен тең-қатар жүрген, кейбіріне үстаз болған.

Жасы жүзге жеткенше жырлап өткен Жамбыл бабамыздың өшпес өнері — қай қырынан алғып қарағанда да таңқаларлық құбылыс. Өскен, өркендерген елдерде Жамбылдай ұлы даңғыл ақындарының шығармашылығын жілікше шағып, туындыларын егжей-тегжейлі талдаумен тынбай, талант иесінің әр қадамын, өмірінің әр сәтін үлкен әңгіменің арқауы етіп жатады. Осындай міnez бізге де ауадай қажет-ак. Бұл зерттеу енбегімізде Жамбыл Жабаевтың өзінің шығармашылық жолы жайында ғана емес, оның үстаздары, тұстастары мен шәкірттері жөнінде де әңгімелеп, осынау ұлы жырдың бастау-бұлағы, дәстүрдің жалғасы, бүгінгі көрінісі туралы да қолдан келгенінше ой түюге әрекет жасадық.

ЖЫР-ҒҰМЫР

Жамбыл Жабайұлы 1846 жылы ақпан айының соңғы күндерінде дүниеге келген. Туған жері — Жамбыл тауының бөктері. Шу өзенінің құяр сағасына жалғаса тізбек-телген Жамбыл, Хан, Байғара, Шағырлы тау сілемдері бүгінде Жамбыл облысының Шу, Мойынқұм аудандарына қарайды.

Жамбыл дүниеге келгенде Жетісу Коқан хандығының кол астында еді. Коқан ханы Құдиярдың Жетісу еліне салған лаңы аз емес-ті. Оның датқалары елді жаялық-ка айналдырып, аузына қакпақ, басына тоқпақ болған. Опасыз шапқыншылықтан әбден ерқашты болып титықтаған қалың жұрт сынаптай сырғып, жөңкіліп көше берген. Ығысып, үдере көшкен сондай бір боранды қыста Ұлдан ана көш жөнекей түйе үстінде толғатып, болашақ ақын ықтырма күркеде дүниеге келеді.

Жамбылдың өзін көрген, өмір жолын білем дейтін кісілердің айтуынша, жаудан ығысып көшіп келе жатқан ауыл толғақ қыскан Ұлдан аианы көрген сон, көшті тоқтатып, жүк артқан түйелерді шенбер жасай шөгеріп, айнала жүкпен қоршап, киіз тұтып, ықтырма жасайды. Ұлдан ана осы ықтырмада босанады.

Жамбыл бірде өзінің шәкірті әрі інісі Кенен Эзірбаев-пен кең жайлауды аралап, Құлансаздың биік жотасынан төнірекке көз жіберіп:

— Сонау мұзбен жүгенделіп, тас арқалап комдалған Құмбелден бері қарай картадай қатпарланып тәгілген төс — Қарақия талай отырған жеріміз. Батысқа қарай созылып шөгіп жатқан Шетендінің жотасы — Қырғызбай шекарамыз. Қарақияның басы Қарақастек өзенінің түйіғымен құшактасып жатыр. Соның он босағасынан бері қарай тәгіліп жатқан Қарабастау, Құлансаз, Қөктүма, Желдісай. Бұл жағы Майтөбеге келіп қойындасады. Қөгендеген қозыдай көк бүйра адырлар қабат-қабат жасыл барқыт сияқты, қоңыр самал желі үзілмейді. Шайдай ашық бол турып кейде бұлты үркіп шыға келे-

ді де, лезде шымқап алып нөсерлетіп күя салады. Осын-дай ала құйын мінезі де бар.

Күнде басын шүйкелеп,
Аспанға басын үйкелеп.
Қағып-сілкіп тұратын тау емес пе бұл!

Мұның қай сыры мәлім емес бізге? Сонау ойдым-ойдым көгергендердің бәрі елдің жұрты — қебі байдың жұрты. Он төрт жасынан бері көрген жерін кісі білмесін бе. Сонау арғы жактағы Қарағайлышың кезеңі — Шалтабайдың жұрты. Майтөбенің кезеңі — Жылқыбайдың жұрты. Бұл жұрт жиырма тоғызыншы жылы ғана босады,— деген екен. Жәкең өмір бойы қызықтап, жырына қосқан сол Құлансаз батысында Майтөбемен құшақтасып, одан әрі Суықтөбемен жалғасады. Суықтөбе Алатаудың сілемін Кордай жотасымен жалғастырып аяқтасады.

Міне, Шапырашты-Екейлер жаз бойы Құлансаз, Суықтөбе, жайлауларын самалдал жайлайды да, қыста Байғара, Ханжамбыл тауларының қойнауын паналайды. Жамбыл туғанда атасы Істыбай жиналған жұртқа:

— Елім, жұртым, біз естіп-білгелі Шапырашты екі жерде жан сақтап келеді, жаз Құлансазды жайлаймыз, қыс Ханжамбылды паналаймыз. Қалың елге пана болған қойны жылы, қойнауы құт Ханжамбыл — қасиетті тау. Ханжамбылдай биік әрі елге пана болсын, немеремнің атын Жамбыл қойдым,— деп нәрестенің құлағына үш рет айқайлап, батасын беріпті.

Жамбыл дүниеге келген шақта керең дүние кедейдің үнін естімеуші еді. Қыспакқа төзе алмаған халық алым-салықтан бас тартты, азаматтар атқа қонды. Саурық, Сұраншы, Андас, Сарыбай ел ішінен кол жинап, Коқан ханының Жетісуға сайланған бегі Қанатшаға қарсы күреске шықты. Халықты біріктіруде аталған батырлардың еңбегі зор болды.

Саурық, Сұраншы — ағайынды кісінің балалары, Саурық үлкен, Сұраншыны батырлыққа тәрбиелеген. Алпыс жасында Суықтөбе бауырында дүние салады, сонда жерленген.

Сұраншы (1817—1864) — ержүрек, қайтпайтын қайса, зор денелі, ұзын бойлы, сол жақ бетінде шешектен қалған дағы бар, даусы жуан, сөзге шешен, қарашұбар кісі екен.

Орыс армиясымен келісіп, Сұраншы мен Сарыбай бес мың қол жинап, Ұзынағаш тұбінде Қанатшаның қа-

лың қолын талқандап, өз жерін Коқан қыспағынан азат етеді. Бұл соғыста Сүйінбай Сұраншының сарбаздарына жалынды жырмен дем берген, жауынгер үгітшісі, ұраншысы болған. Шоқан Уәлиханов Гутковскийге жолдаған хатында Сұраншының орыс армиясына адал екендігі жөнінде ашық жазады. Сұраншы Коқан хандығынан Әулиеатаны азат етіп, Ұлы жұз батырларының Коқанға қарсы соғысында Сайрамда 1864 жылдың шілдесінде ерлікпен қаза табады.

Сарыбай аяғынан жараганып, Ташкенге дейін барады. Осы сапар полковник шенін тағынады. Сайрамнан Сұраншының сүйегін әкеліп ауылына жерлеген де осы Сарыбай.

Міне, Жамбыл осындай қарбалас кезенде, аласапыран қыспақ заманда дүниеге келген.

Жамбыл бала күнінен бетті болып еркін өседі. 8—9 жасқа келген соң-ақ койшылармен, жылқышылармен бірге жүріп, солардан неше алуан азыз әңгіме, өлең-жыр естиді. Өзі де жыр айта бастайды. Асау тай үйретіп, бас білдіруді де өзінің ең сүйікті, қызықты әдетіне айналдырады. Сөйтіп, жарқын жүзді, көпшіл, өр мінезді қайсар Жамбыл ел ішіне тез танылады. Оның көргенділігі де елге қатты ұнайды.

Бірде ол ауыл сыртынан Қазыбек деген қарт кісіні көріп, оған арнайы бұрылып келіп сөлем береді. Қарияның жолаушылап келе жатқанын біліп, үйіне шақырып алып келеді, атын байлап, үйінің есігін ашып, өзін төрге шығарады. Бел жазып, үй-ішімен жөн сұрасып, көнілі жайлантан қонақ Жападан баласының жасы, ісі туралы сұрайды. Жапа баласының ісін айтып, ісіне көнілі толмайтындығын білдіргенде, Қазыбек аксақал: «Жүзі ашық, жанары нұрлы екен, бетін қайтарма, теріс кетпес» дегенді айтады. Жамбылдың бала кезіне қатысты осы секілді басқа да әңгімелер бар.

Жамбылдың ата-тегі кедей, момын шаруа болған. Экесі Жабай орта бойлы, жұмыр денелі, ат үстінде әбжіл, найзагер кісі екен. Досына мейірбан, дүшпанына катал болса керек. Оның ел, жер, барымта дауларына араласып, бітімгершілік айтқан кезі де болыпты. Осындай ерекше мінезін, жауынгерлігі мен бітімгерлігін ұнатқан Әшекей оны қасына алып, өзінің малшы жігіттеріне басшы етіп ұтайды.

Жабайдың жұбайы Ұлдан Орымбетқызы Жаныс елінен. Олардың ата-бабалары ертеде Қаскелен, Шу; Талас

және Ұзынағаш бойында көшіп-қонып жүрген. Әшекей — сол Жаныс елінің ауқатты, белді адамы.

Ұлдан көп сөйлемейтін, сөйлесе тауып айтатын, турашыл тік мінезді, әрі абысын-ажын арасында бетті, беделді ана болыпты. От көзді, тәмпіш мұрынды, бүйрек бет, нұрлы жүзді, қызыл шырайлы кісі екен. Жамбыл сол анасынан айнымаған деседі. Ұлдан той-жиындарда қыстырып өлең айта беретін, әсем дауысты әнші екен. Бірақ онысын өнер тұтпаған.

Жабайдан Тәйті, Жамбыл, Қоман атты үш ұл туған. Жабайдың әкесі Ыстыбайдан Қазыбай, Жабай, Жадыра туады. Ал Ыстыбай Байтөбет деген кісінің тоқалынан. Оның бәйбішесінен Бұғы, Марал, Бәйіт тарайды. Бұғыдан Қененбай, Байбосын, Денгелбай, Тенселбай деген төрт жігіт — бәрі де өнерпаз, сері, домбырашы, әрі палуан болыпты. Маралдан Мейірман, Сәтбай, Мырзалы, Шопа, ал Бәйіттен — Халық, Әлтай, Үйрыс. Бұлардың Шопадан басқасы момын шаруа екен. Шопа найзагер, батыр болған деседі. Байтөбеттің әкесі Сәдібек кезінде ел билеген кісі көрінеді. Одан Алтыбай, Жетібай, Толыбай, Үрысбай туған. Сәдібектің әкесі Сопак, одан Таңатар. Оның әкесі Өтеп — Жамбылдың жетінші атасы. Ол Бертіс деген атадан тарайды. Бертістің Өтеғұл, Солағай, Кәдіршік, Төкеш деген балалары болған. Бертіс пен Ақтөбет Жерімбет деген батырдың бәйбішесінен, ал оның кейінгі әйелінен Әжібай, Әлти тарайды. Әжібайдан туған Қосай сол елдің айтулы шешені, әрі батыры екен. Оның алдынан сөз шешімін таппай кетпеген.

Қырғыз, қазақ бас қосса, топ жарады,
Жиреншедей тілі бар ер Қосайдың —

дегенде Жамбыл сол Қосай бабасының тапқыштығын айтқан. Ал Әлти, оның баласы Құсеп өз дәуірінің өнерпаз ақын, қобызшысы болыпты. Құсептен Арон, одан атақты Сүйінбай тарайды.

Жерімбет, Бейімбет Екейдің бәйбішесінен-туған. Тоқалынан Энет, Шиет тарайды. Бұл екеуінің аны — Алтынайды ел «бүйдалы келіншек» дейді екен. Себебі, ол келіншек болып тұскенде мойнына алқа, танауына зере салып келсе керек, екі көзі танадай, аса көрікті еді деседі. Содан Энет, Шиет тұқымын ел «бүйдалы» деп атап кетеді. Сонымен Екей Жамбылдың оныншы бабасы болып шығады. Ол Шапыраштының үшінші үрпағы.

Екей жүрті кезінде:

Екейде елу бақсы, сексен ақын,
Жаратып мінеді екен ертеп атын.
Кобызы, домбырасы үнін қосып,
Гулейді жын қакқандай кешке жақын, —

дейтін ақын, жыршылық өнер дарыған орта.

Екейлер ертеде бытырап, әр ру ішінде қоңсы қонып басы бірігіп, бір жерде қоныстанбаған ел екен. Олар бірде Шу өзенін өрлеп, Кіндіктас, Сарыбұлақ бойын жайлап, кейде Алатау бектерін жағалай көшіп-қонып жүрген. Екейлердің бытырап көшіп жүруінің себебін ел былай әңгімелейді:

Әлгіде айтылған Әлти жігіттері Дулат Эймембеттің үйірлі жылқысын барымталап, қырғыз тауының бір күсына жасырады. Эймембеттің Сексен деген баласы құс салып жүріп, «Қордай асып, қырғыз тауының шығыс бектерінде қаптап жатқан жылқыға кезігеді де, жылқы үйірін таниды. Әсіресе, Эймембеттің көзіне атасының Жиренқұла айғыры оттай басылады. Ол еліне қарай айдамақ болғанда, Әлти жылқышылары оны соққыға жығып өлтіреді де, астындағы қара жорғасын қырғыз еліне асырып жібереді. Сексеннің тазысы мен құсы еліне барады. Жігіттер ізге түседі. Бірақ Сексенді таба алмайды. Кейін Дулат елі қырғыздан жылқы сатып алса, ішінен Сексеннің қара жорғасы шығады. Сұрастыра келсе, Сексенді Әлти жігіттерінің өлтіргені анықталады. «Қанға қан» деп енді бүкіл Дулат көтеріледі. Сексенге жеті ердің құнын сұрайды. Екей елі құнды төлемек болады. Екейдің малы жетпей, қарызданып әрең құтылады. Ел ыдырай бастайды. Бір ауылы Найман арасына, енді бірі Іле бойындағы Сары Үйсінге, бірі Албанға сіңісп кетеді. Жапа әuletімен Жаныс ішіндегі Әшекей байға барып паналапты. Сонымен Екейлердің ата қонысын Дулаттың Сәмбет деген руы мен Ескожа үрпағы басып қала береді.

Кейін Айdos баласы Сарыбай атқа қонып, сол бытыраған елдің басын қосқан дейді. Осы бытырау Екей еліне мін болады. Өзара айтыста да, Жаныс ақынмен айтысында да үнемі осы сөз етіледі.

Ел ішінен «Екей ел болды, ешкі мал болды» деген мәтел де шығады. Екей өзінің аталас руы Ескожа елімен үнемі айтысып, шабысып өткен. Ескожадан батыр, бай, жуандар көп шықкан. «Сәтина мен Намаз» айтысында осы аңыз айтылады. Сәтина — Ескожаның Қараш деген батырының немере қызы. Ал Намаз Екей ақыны. Екеуі

тойда кездесіп айтысқан деседі. Намаз жеңіп, айтыстың аяғы төбелеске айналады. Ескожаның датқасы Андас:

— Тойымды бұзды, жігіттерің айып төлесін — депті. Оған Сарыбай:

— Уәж айтқанға айып төлей беретін енді Екей жок. Андасқа сәлем де, қарындасын тыйып алсын! — дейді. Осыдан былай Екейдің еңсесі көтеріліп, Ескожа елі жағына қалады.

Ескожа Шапыраштының екінші баласы. Оның Айқым деген ағасы, Еміл, Екей, Шыбыл деген інілері болған. Бұлар Сүйінбай, Жамбыл дастан етіп жырлаған Сұраншы, Саурық батырлардың арғы аталары.

Ал Жамбылдың он бірінші бабасы — Шапырашты және оның үрім-бұтак тармақтары жөнінде ел арасында шежіре, азыз өте көп. Ұлы жүздің Бәйдібек деген ел басы батырының үш әйелі болған. Бұл — Жамбылдың он бесінші бабасы. Оның Сары бәйбішесінен — Қалша, Жақып, екінші әйелі Зеріптен (аса көрікті, кербез, үнемі сыланып әсем киініп жүргендіктен ел оны Сыланды сұлу деп атап кеткен) Жәлмембет, одан Мапырашты, одан Шапырашты тарайды. Жәлмембеттің екінші әйелі Қарашаштан Ысты, Ошакты елі шығады. Бәйдібектің үшінші әйелі Нуриладан (Домалақ анадан) Жарықшақ, одан Албан, Суан, Дулат тарайды.

Ата-бабалары, әсіресе Домалақ ананың асыл қасиеттері хақында Жамбыл өзінің Сарыбас ақынмен айтысында жеткізіп айтқан.

Ол кезде Қоқан хандығы Әулиеата, Меркіні жайлап, Жетісу қазактарынан зекетті аямай жинайды екен. Ол аз болғандай, қырғыз манаптары да ығыстырып, екі жақтан Шапырашты елін қыспаққа алған. Меркіні билеген Қоқанның Құсбек деген бегі зекет, ұшырды көбейтеді. Бір жолы Дулат Коралас аулының бойжеткен қызы мен жаңа түсіп отырған келінін төре шақыртады деп Меркіге алып кетеді. Артынан Коралас жігіттері Тойшыбек батырға барады. Тойшыбек Құсбекке бата алмайды. Сонда Тойшыбектің баласы Байсейіт:

— Эке, неге қорғалай бересіз, бата алмасаңыз мен барайын! — дейді. Байсейіт сонымен Құсбектің ақ орда-сына кіріп барса, ол қыз-келіншекті жинап, өзі ортада қорқор тартып отыр екен.

Құсбек сасып қалыпты:

— Бала неге келдін?

— Жездеме сәлем бергелі келдім, — дейді Байсейіт.

— Мендей жездे тапқан адам тақиясын аспанға лақтырып куанса керек еді.

Сонда Байсейіт сегіз өрме, бұзау тіс қамшысымен Құсбекті:

— Мә, саған жезде!— деп сабай беріпті. Сыртта тұрған жігіттер бекті үйден сүйреп ала жөнеледі. Бұл оқиғаның аяғы біраз қактығыска айналады. Байсейіт жігіттері жеңіп, қоқандықтарды мекеніне күп тығады, аяғы бітімге келеді. Осы оқиғадан кейін Екейдің еңесі тағы бір көтеріліп қалады.

Сарыбай — Шапыраштының Теке деген атасынан. Олар Есік, Тұрген жағын мекендереп келген. Сарыбай жас кезінде Бөлек батырға барып қызмет етеді. Атын ерттеп, қолына су күйип жүреді. Бөлек көп сөйлемейтін, томаға түйік адам екен. Жолшыбай келе жатып ол:

— Шырағым, осы сені маған кім жіберді?— депті. Сонда Сарыбай:

— Кененбай атам,— деп жауап беріпті. Кененбай батыр Бөлекпен дос екен.

Сарыбай Бөлектен бата алып еліне келеді. Сұраншымен бірігіп орыс әскерінің алдынан шығады. Сөйтіп, Сұраншы мен Сарыбай өзінің жігіттерімен Меркіге, одан кейін 1864 жылы ол Колпаковскийдің әскерін бастан Сайрамға дейін жорық-сапар шегеді. Сайрам соғысында Сұраншы қаза болып, Сарыбай жарапанады. Ол сонда да саптан шықпайды. Ташкенге дейін барады. Әскери шен тағып жігіттерімен еліне қайтады.

Сарыбай Ұзынағаштағы приставқа келіп, өз алдына дербес болыс болуды өтінеді. Ұлықтар рұқсат етеді. Осылай олар Есқожа болыстығынан бөлініп, Екей, Айқым бірігіп, Қарғалы болысы аталады.

Ел билігі қолына тиген ол жан-жақтағы бытырап жүрген Екей руын жинастыра бастайды. Іле бойындағы Сары Үйсін арасына сіңісп кеткен «бүйдалы» тұқымын көшіріп алдырады.

Сарыбай орыс ұлықтарының сеніміне еніп алып, Есқожаны ығыстыра береді. Есқожа жерін бергісі келмегенмен, Колпаковскийге сүйенген Сарыбай, белдесіп келгенде, шыдатпай жеңе береді. «Алты қасқыр андай шабады, аксақ қасқыр жандай шабады» деген мақал осы кезде шығады. Алты қасқыр — Есқожаның ру басы алты адамы болса керек. Аксақ қасқыр — Сарыбай еді деседі. Өйткені, Сарыбайдың он аяғы аксақ екен.

Жер бөліс кезінде талай таластар өтеді. Бір жазда Екей, Есқожа бірігіп, Тілеуқабыл ауылын тоған басынан

тайдырмак болады. Төбелесте Тілеуқабыл руының жігіті Самсы Есқожа жағын беттепей жүріп, тоған басында сойылға жығылады. Сол жер «Самсы» атанып кетеді. Осы соқтығысқа Жапа мен Жадыра қатысқан деседі ел.

Жамбыл Жабаевтың өмірі мен шығармашылық қызметі өте күрделі. Ол жұз жасап, екі дәуірді басынан өткөрген ақын. Жамбыл өмір сүрген дәуір Россияда демократиялық көзқарастың кеңінен қанат жайған, әдебиет пен мәдениет ілгерішіл, ағартушылық, демократиялық жолмен дамыған кез болса, Қазақстанда өндіріс орындарының ашылып, оған шетел өнеркәсіпшілерінің иелік еткен тұсы еді. Бұл кезде қазақ халқының саяси өмірінде күрделі өзгерістер болып жатты. Атап айтқанда, қазақ халқы Россияға қосылып, орыс халқымен экономикалық әлеуметтік қарым-қатынас жасай бастайды. Қазақ даласының терістік, батыс жағынан шығыс пен онтүстігіне қарай бет алған орыс әскери экспедициясының алды Алатау атырабына жетіп, бекініс, қамалдар құруға кіріскең шақ. Бұл кезде Қазақстанның онтүстік жағы, Жетісу өнірі түгелдей Коқан хандығының қол астында еді. Осы кезде қазақтың байлары мен ел басқарған кісілерінде екі түрлі жол жатты. Бірі — орыс әскери экспедициясымен бірігіп қоқандықтарға қарсы шығу. Екіншісі — қоқандықтармен тіл табысып, орыстарға қарсы күресу. Жетісу қазактары, оның ішінде Шапырашты руының Бөлек, Сұраншы, Сарыбай сияқты ел басы, батырлары орыс армиясына қосылады, сөйтіп қоқандықтарға қарсы шабуылға шығуға бекінеді.

Орыс әскери отряды Іледен өтіп, Үлкен Алматы өзеніне, Есік көлі маңына келгенде, сол отрядта Н. Г. Потанин де болған. Н. Г. Потанин орыс әскерінің Жетісу өлкесіне келу жолын, оған жергілікті ел адамдарының ықылас-ниетінің сипатын байқап, бағдарлап, білген жайларын қойын дәптеріне түсіріп отырған. Қаратал бойындағы қазактардың орыстарды шын ықыласпен қарсы алып, өздерін Коқан езгісінен құтқаратын күшті солардан тапқандай қуанады. Орыс әскеріне қалың бұқаралың үйғарымы бойынша жол көрсетіп, көмектесуші Бөлек батыр болады. Ол кейін Іле бойында да орыс әскерінің атынан жергілікті халықпен сөйлесіп отырған. Алматы өзені бойында халықтың үш күнге созылған үлкен жиналысы өтіп, онда орыспен бітім, немесе соғыс мәселесі талқыланады. Орыстармен достықты жақтаған Ди-ханбай бастаған топ көпшілік қолдап, женіске жетеді.

Женіліс тапқан аз ғана топ Шу бойына коныс аударды.

Ел өміріндегі осы аталған саяси-экономикалық өзгерістер Жамбылдың сана-сезіміне әсер етпей қоймаған. Ол бала кезінен-ақ еңбекші бұқараны қолдап өседі. Жастайынан еңбекші таптың жырын жырлайтын демократиялық, прогрестік бағыттағы ақын болып қалыптасады. Жамбыл өзінің ақындығының 75 жылдығы түсінда айтқан «Менің бақытым» атты өміrbаяндық әңгімесінде: «Мен өзімнің барлық өмірімде қыр кожайындарының бетіне шындықты қорықпай айтып, шайқасумен өттім»,— деген. Ақын табиғатындағы бұл қайсар да асыл мінездің тұп негізінде ол туған, өскен ортаның ілгерідегідей қайшылықты шындықтары да бар еді. Ақын дүниеге келген кезендегі тарихи шындық-ахуалды, ел ішінің тартыс-таласын егжей-тегжейлі әңгімелеп жатқандағы максатымыздың өзі де Жамбыл жырларындағы әлеуметтік сарынның бастау көзін ашу, талантын ұштай түскен қогамдық құбылыстардың табиғатын тану.

Жамбылдың өнер жолында кедергі-тосқауыл аз болмаған. Соның бірі — әкеден. Өлеңмен шағым айтқан жас Жамбылға әкесі Жапа:

— «Екейде елу бақсы, сексен ақын» деген сөз де жетер, сен сексен бірінші болмай-ақ қой. Ақынның түбі — қайыршылық, бақсының түбі — жын, жын жиып, бақсы болып ел кезгенше мал бақ!»— деп қатал үкім айтады. Әкеден осылай көніл қалып, тауы шағылғанмен, жасталант өзінің тұла бойын кернеген өлең жолынан қайтпаған. Қаршадай баланың:

Өлең кірген түсіне
Жөргегінде мен болам, —

деуі де содан.

Жамбылдың әкесі Жабай (Жапа) өзгенін өзіне жасаған зорлығына қарымта ретінде жалғыз жүріп жортормандық жасайтын болса керек. Әкесінің сондай қылыштарын байқап қалған Жамбыл оған наразылық білдіреді. Эке ісін қаламайтынын, колдамайтынын айта келіп, кісіні қапа қылатын қылыштан өзі аулақ болатынын, өлең мен жырды өміріне мұрат ететінін білдіреді.

Батаңды маған бер әке,
Тіліме менің ер, әке... —

деп отырғанда, ақын бала әкесінің қолдауын, ақ жол тілелеп бата беруін сұраумен бірге, жазықсыз біреуге зорлық жасап, малын олжалаудың түбі қорлық екендігін

ескертеді, әкесінің осы айтқан сөзге токтауын талап етеді. Сонда Жамбылдың жасы 14—15 шамасында. Е. Исмайлов бұл өленді ақын он үш-он төрт жас шамасында шығарған десе, Фали Орманов Жамбыл бұл тұста он тоғыз шамасында еді дейді. Мұның шындығын дәлелдеу үшін біз ақынның өз шығармаларына жүгінеміз.

Жамбыл үстазы Сүйінбайдан бата алғанда, он бес жаста. Сүйінбайды пір тұтып, Жаныс ақынды жеңетінде ол жиырма жаста, «Сарыбайға» өлеңін айтқанда — он тоғызда.

Жамбыл Сарыбайды өмір бойы қадірлеп өткен. Албырттықпен қыз алып қашса да, молданың окуынан бәссе де үнемі би ағасына келіп жүгінетіні сондықтан. Оны біз ақынның мына өлеңінен білеміз:

Сар-еке, салдым бір сөз сыныңызға,
Сіздің сын таразы ғой сырмызызға.
Қолыма домбыра алып талап қылдым,
Бересіз қандай баға ұлыңызға?

Жаманың көнілі көкте, жерде басы,
Алыс қой анғарғанға екі арасы.
Жақсының өзі кішік, бойы биік,
Бірдей ме екеуінің мәртебесі.

Біреулер малмен бәрін бөктеріп жүр,
Айтқанда ақыл нұсқа жек көріп жүр.
Көтеріп дүниенің көң-қоқырын,
Апарып қай шұқырға төккелі жүр?

Көнілі кейбіреудің бұлтта жүр,
Ұстауға күн мен айды жуықтап жүр.
Біреулер қара сөзді қамшы қылыш,
Куды мініп, құланды құрықтап жүр.

Қайсысын маған соның еп көресіз?
Әкетсем өзім таңдап өкпелерсіз.
Сүйекемнің сүйгенін ойласаңыз,
Өлең болсын серігің деп берерсіз.

Ақындық өнерді мұрат еткен, сол сапарға белін бекем буған жас таланттың Сарыбайдың алдынан өтіп, одан ақындықтың — Сүйінбайдың жолын құрауы Сарыбайдың өз еліне аса қадірлі екендігін айфактайды.

Өлеңнің соңғы екі тармағындағы «Сүйінбайдың сүйгені» туралы ойды әр түрлі қабылдауға болады. «Сүйінбайдың сүйгені» дегенде, Жамбыл ақындықты, жалпы ақындық өнерді айтып отырғанға ұксайды. Сүйінбай Жамбылға бата бергенде, оның жеке басының қабілетін, ақындық өнерін танып, бойында тас бұлақтың суындағы қайнаштың жатқан жыр қайнарын көрген. Жоқ-жі-

тік жасөспірімнің бойынан Сүйінбайдың тапқаны, сүйіп қадірлекені — оның осы ақындығы, өлеңі. Жоғарыдағы екі тармақтан ақынның өзіне Сүйінбайдың берген батасы туралы Сарыбайға әдейі айтып, Сарыбайдың да Сүйінбайша іс қылғанын қалап тұрғанын аңғаруға болады.

Ақын «Менің өмірім» шығармасында он жастан өлеңге көніл бөлгөнін, он бес-он алтыда ауыл таныған ақын болғанын, он жеті жасында жаңа биікке самғап шыққанын айтады:

Топ десе он жетімде тартынбадым,
Семсердей майдандағы жарқылдадым.
Ақынды ауылға ермек басып озып,
Жұлдыздай көзге түсіп, жалқынадым.

Осы жолдарды оқығаннан кейін, ақынның «Әкеме» өлеңіне қайта оралсақ, онда оның он жетісінде «семсердей майданда жарқылдаған», «Жұлдыздай көзге түсіп, жалқындаған» ақынның айтқаны еді деу ойлауға, танымға қайшы келген болар еді. «Әкеме» өлеңі «семсердей майдандағы жарқылдаған» ақынның аузынан шықты деуге лайықты емес, бұл — ақындық жолды батыл қалап алғанмен, әлі де шеберлігі таныла қоймаған жасөспірім ақынның өлеңі деуге лайықты шығарма. Осы жайларды ескере отырып, біз Жамбылдың «Әкеме» өлеңі оның он төрт-он бес жасар шағында, Сүйінбай мен Сарыбайдан бата алғанға дейін шығарылған деген Қ. Әзірбаевтың пікірін шындыққа жақын деп білеміз.

«Ақын болдым он үште» деп басталатын 7—8 буыннан құралған толғау-жырында ақын 13 жасынан 76 жас аралығындағы өмір жолдарынан елес береді. Әуелі жанжағына жалтақтай қарап жүрексініп жүргені, 13 жасынан бастап ақындыққа шұғыл бет бұрғаны, ауыл-ауылды аралап, өзі тұстас біраз ақындардың аяқ алысын байқап, оларменен өлең-жыр жарыстырып, сынасып келгені баян етіледі. Жамбыл жас кезінен-ақ мақтаншактықты, мансапқорлықты, жалғандықты қаламаған, дүние қумаған. Оған ақынның мына шумақтары айғақ:

Жалған ақын кез болса,
Жасқанып жол бермедім.
...Өтірікті сүймедім,
Дүние үшін күймедім.
Алтынына біреудің
Жолда жатса тимедім.

Жамбыл ақындық айтысқа 17—18 жасында араласып, көптеген өлең-жырларын, «Көрүғлі», «Өтеген» сијакты дастандарын да сол тұстарда жырлай бастаған.

Он жеті мен он сегіз,
Тал шыбықтай бұралған.
Жас ақын Жамбыл атақты,
Он үштен бастап сыйналған.
Жүйесін тапқан жел сөзді

Үйсін, Найман құп алған,
Көрүғұлы сұлтан, Өтеген,
Шежіресін тыңдаса,
Шығушы еді құмардан.

Оның алғашқы ақындық жолы теп-тегіс тақтайдай болмаған. Талай қындықтарға, жоқшылық-тапшылық, кедергіге ұшырап күншілдіктің мергеніне кезігеді.

Жиырмаға жасым келгенде,
Ор текедей желгенде,
Алдынан шыққан кес-кестеп,
Жолықтым талай мергенге.

Бұған Жамбыл жасымайды, қайта өршелене күресе ту-
седі, ақындық өнері бұрынғыдан да тасқындай береді:

Асылдан соққан ақ семсер,
Келемін мен де қайыспай!
Тот баспадым, сынбадым,

Өзімді-өзім шындарым.
Қырғыз-қазақ жылса,
Топты жарып жырладым.

Бұл — ақынның өмір өткелдері жайындағы алғашқы туындыларының бірі. Өз ғұмырнамасын Жамбыл 1938 жылы да жырлаған. Ол, әрине бұдан толығырақ.

Жамбылдың ақындық жолға түсуінің ең әдепкі адымы өзінің алдындағы белгілі ақындардың өлеңдерін, ел аузындағы өлең-жырларды жаттап айтудан басталады. Жас ақын Жетісу елінің ертедегі салтымен бәдік, жарапазанды да көп айтады, көбіне күлдіргі, әзіл-қалжын өлеңдер шығарады. Жарапазанды сұлтауратып жас ақын бірде әйгілі Сүйінбайдың аулына келіп, Сүйекен-нің үйінің сыртынан ат үстінде өлеңді ағытып коя береді. Жамбыл ұзақ жырлайды, Сүйекен жалықпай тыңдайды:

Ей, өлеңім келді жол шегіп,
Осынау елге алыстан.
Түн болды, үйге ен дейтін
Табылмай түр таныс жан.
Ардақты үйдің иесі,
Рұқсат ет кіруге.

Бата бер менің жырыма
Қуат бітіп үніме,
Көңілін тапсын елімнің,
Жар бол да, өзің жәрдем ет,
Жібер мені бір демеп...

Алдына келіп, бата сұраған талапкерлердің көбін көрген, бірақ дәл мынадай тұнық жырды көптен естімеген Сүйінбай жастықтан басын жұлып алып, ақын баланы үйге шақырады.

— Шапыраштыда бір жыршы бала бар деуші еді, сол екенсің ғой, жоғары шық! — деп Жамбылды төріне шығарады.

Атағы алыс-жакынға бірдей тараған ақындық ақын мен жас қыран шыны көңілмен ұғысып табысады. Ұлы ақын-

ның өз өнеріне деген шын бейілін таныған Жамбыл неше алуан өлең-жыр тасқынын тасытып айтады. Келген қонағының жасы кіші болғанмен, өнері, ақындығы үлкен екендігін таныған, өз айналасынан осында өнерпаздың өсіп келе жатқанына қуанған әрі риза болған карт жырау: «Осы шабысынан тайма! Өлең-жырынды дауылдата бер! Жолың болсын! Бақытың ашылсын, балам! Шындықты айт, әділдікті жырла! Көне, тозығы жеткен жолға түспе, жаңа жол, даңғыл жолға түс! Өлеңің бүкіл халық сүйсініп көнілімен иіліп тыңдайтын өлең болсын! Сенің көніліңнің асылы патшаның қазынасынан да бай болсын!— деп бата береді. Бұл Жамбылдың он бес жастағы кезі еді.

Сүйінбайдың өз тұсында аса ірі тұлғалы шешен, алғыр ойлы, парасатты ақын болғаны белгілі. Оның өлең, толғау, айтыстарынан реалистік, демократиялық, халықтық сипаттар айқын аңғарылады. Сүйінбай өз заманының әділетсіздерін шен-дәрежесіне, бедел-бедеріне қарамастан сынап отырған. Еңбекші бұқараны, оның арасынан шығып, қорғаны болған Сұраншы, Саурық, Сыпатай сияқты батырларды жырлаған, халықтың мұнын мұндалап, жоғын жоқтаған.

Жамбыл өз бойына Сүйінбай үстазының ақындық, азаматтық өмірінің осы қасиетін дарытады. Оның Өтеген, Сұраншы, Саурық, Жабай батыр туралы дастандарын және Тезек төремен, қырғыз ыршысы Қатағанмен айтысын үйренеді. Шәкірттің жаттап алғыштық қабілеті бұл кездері аса ересен болса керек. Бір жолы Сүйінбай өзінің алдындағы жүйрік, ділмәр ақындарды еске ала отырып, Жанкісі жыраудан сөз қозғайды.

— Наймандар арасынан Жанкісі деген батыл сөйлейтін шешен ақын шығыпты. Оның жасы бізден көп үлкен еді. Сол Жанкісі қоқандықтардың бір ұлығына барып былай депті:

Өзіңіз қосқан зекетші
Біздің елде Жұзбай бар.
Жұзбайдың жүрген жерінде
Жылау менен ойбай бар.
Шоңмұрат деген молдасы бар,
Төлеген деген жорғасы бар,
Атына жемді салуға
Алты еннен қылған дорбасы бар.
«Елі тұсім» деп алады.
«Кеусенім» деп алады.
«Орта зекет» деп алады,
«Күшақ зекет» деп алады.

Айтайын десең үрады,
Ұрмак түгіл қырады,
Алдына салып айдайды,
Ашулансан байлайды.
Әкімі жоқ қазаққа
Тендік жоқ деп ойлайды.
Алса малға тоймайды.
Ел ішінде ажарлы
Қыз, қатынды қоймайды.
Жақсыларды сөгеді,
Ат үстінен тебеді.

Кенен Эзірбаев Жанкісінің бұл өлеңінің өзін де, шығу тарихын да Жамбылдан естіп, жадына тұтып қалғанын айтады. Жамбыл мұны ұстазы Сүйінбайдан естіген. Жанкісі ақынның осы өлеңі оның 1875 жылы жарық көрген нұсқасынан көп алыс кетпейді. Е. Ысмайылов өзінің «Ақындық өмір» кітабында бұл өленді тұтас келтіреді. 1885 жылы бұл өлең орыс тілінде басылған.

Жамбыл Жанкісіні көрмеген. Жанкісі дүниеден қайтқанда Жамбыл 3—4 жастағы жас бала. Бірақ есейе келе, ауыл ақындарынан, ұстазы Сүйінбайдан ел мұддесін қорғап сөйлеген көптеген ақындардың жырын тындайды. Жанкісі де сондай ақындардың бірі ретінде жас Жамбылдың есінде мәңгі қалып қояды.

Бір ауылға ақын келіпті десе, алдымен ақын, жыршы, өлеңшілердің құлағы елең ете қалатын әдеті емес пе. Олар бірін-бірі лезде іздеп тауып алады. Өлең, жырхикаяларын тындасады. Өзара жыр жарыстырады. Тіптен қыза-қыза келе айтысып та қалады. Осындағы ортада өскен Жамбыл талай майталман ақындармен кездесіп, өлең-жырларын ортаға салысып, сұхбаттасқан. Үлгісі, өнегесі озық ақындарды ұстаз тұтқан.

Жамбыл кейінірек «Өсиет» деген өлеңінде:

Қылышбайдан таралып,
Сөз нұсқасы келінген.
Дос-жаранға, кемтарға,
Кайырлы бол делінген, —

деп жырлаған. Сол сиякты Бақтыбайға кездескенде де ол:

Каздай қалқып ерінбей
Өлең тердім жасынан.
Майкөт ақын, Құлмамбет
Орын берді қасынан, —

деп, сондай ірі ақындармен талай рет бірге болып, олардың бірқатарын ұстаз тұтқанын, біразымен терезесі тең тұрғанын айтады. Сонымен бірге өзі ұстаз тұтқан ақындардың кісілік, ізгілік жолына нұскаған өсиет сөздерін де Жамбыл аса қадір тұтып, өзінің жырларында да, күнделікті тұрмыста да ұстаз өсиетін ешуақытта аттап өтпеген. Алдындағы ірі ақындарды ардақтаған, сөйтіп өзі де ақындық айналасына, ұстаздарына, сыйлы, қадірлі болған. Өйткені бәрінің де өмірі, өнері, өнегесі халықтың қаны мен жанынан жарагандай, ел тағдыры мен мұддесі жолында рухани тұтастыққа айналған. Әрі олар тағдырлас та.

Ақын «Менің өмірім» атты өмірбаяндық шығармасында он жастан бастап өлеңге ден қойғанын, он бес жаста домбыраны қолға алғып, өлең-жырда «тең басқан төрт аяғын жорға болғанын» айтады. Он жеті, он сегіз аралығында өз тұстастарынан оқ бойы озып шығып, жыр көгіндегі жарық «жұлдыздай көзге түсіп», сәуле шашады. Осында ел таныған ақын атанған он жеті-он сегіздегі жігіт шағында-ак Жамбылдың жырларының халықтық сипаты арта түсіп, терендей береді.

Жамбыл өз төңірегіндегі ақындарды он алты жасында-ак тегіс танып болады, олармен жиын-тойларда бірге болып, көптеген өлең-жыр, күй үйренеді, өзі де өнерін көрсетеді. Өзі қатарлы ақындармен айтысып та жүреді. Ақынның жас кезіндегі өлеңдерінің де, айтыстарының да көпшілігі, өкінішке орай, бізге жетпеді. Ел арасында сақталған, ақынның өзі де есінде ұстаған осындағы айтыстарының бірі — Жамбыл мен Сайқал қыздың айтысы.

Сайқал — Таластың төменгі сағасында аты шығып жүрген ақын қыз. Жамбылдан жасы аздап үлкен болса керек. Елінен жалғыз шығып жүрген салт атты, сабау қамшылы саяқ деп, Жамбылды үнемі кемсітеді екен. Қыздың бұл мінезін байқаған Жамбыл айтысуға бел буады. Жігіттің айтыспақ ниетін қыз да байқайды. Ол да іштей дайындалып жүреді. Бірде көрші ауыл ақындарының біразын қасына ертіп, Жамбыл Сайқал қыздың үйіне келеді. Ақбоз үйде, ак торғын көйлек киген аққұбаша сұлу қыз сәнді кебісін аяғының басына іліп, көсілген аяғын бір көтеріп, бір түсіріп ойнап отыр екен. Жамбыл үйге кіріп барса, әлгі қыз:

Жіп айыл, құр құйысқан, киіз терлік,
Япыр-ау, бір соны елді жаңа көрдік.
Жиылған ақсақалдар, бозбалалар,
Қалайша бұл Жамбылға жауап бердік?

дейді. Соңда Жамбыл:

Арқаның жардай болар сары нары,
Кетпейді Алатаудың жаздай қары.
Істікке шанышқан сирактай қып,
Куартпай аяғынды тартсаңшы әрі, --

депті.

Бұрын ауыл арасында ақын аты шығып жүрген азamatтардың біразымен сөз қағыстырып, басым түсіп жүргенмен, дәл мынандай тосыннан сұрып салып әрі қисынын тауып айтатын ақынды Сайқал кездестірмеген еді. Сәнді кебіс ілген аяғын бір көтеріп, бір түсіріп ойнап отыруы онын қыз басына үлкен мін екенін, сол

мінін Жамбылдың көріп қана қоймай, уытты жырға айналдырып салғанына куә болған қыз жауап сөз қайтаруға жарамай, тосылып қалады. Қыздың мұдіріп қалғанын байқаған женгесі айтысқа араласады. Жамбылдың аяғындағы мәсісі ескі, қалпағы көнелеу болса керек. Қыз бер оның женгесі бірін-бірі демеп, Жамбылдың басы мен аяғын олқы көріп, кедейлігін айтады, елінен жалғыз келіп, сауық құрып жүрген саяқ кезбе деп кемсітеді. Қыз бер оның женгесінің сөзіне, жеке басына тиіскен астамшылығына шыдай алмаған ақын сөзінің бар уытын алдымен қызға жұмсайды:

Атынды қойған екен тауып Сайқал,
Әркім мініп тастаған сен бір байтал,
Қалай-қалай сөйлейсің, ей, әдепсіз,
Әлгі айтқан сөзіңің бәрін қайта ал!

Мінін дәл айтқан соң үнсіз отырып қалады. Сонда қыздың женгесі тоқтамай, әр нәрсенің басын шатып, ақынның намысына тие түседі. Сөйтіп отырып, иегін сипай береді. Эйелдің иегінде теміреткі секілді бір боларболmas қана байқалатын жаракатының ізі болса керек. Соны байқаған ақын:

Ендеше котыр қатын, котыр қатын,
Жайыңа қыстырылмай отыр, қатын.
Кесірлі қыз, қатынмен айтысатын
Мен емес үй арасы жаяу ақын, —

деп салады. Осыдан кейін үйдегі бәйбіше тоқтау айтып, Жамбылдың женген жоралғысын жасап, шығарып салады. Сайқал қыз осыдан кейін айтысуды қойған екен деп әңгімелеген-ді бізге Кенен Эзірбаев.

Жамбылдың Сайқал қызben айтысы туралы әңгімелердің бір нұсқасын ардакты қаламгеріміз Сапарғали Бегалин Амангелді колхозында тұратын Аманқұл Желдібай баласынан 40-шы жылдары жазып алған.

Жиырма жастан бастап, Жамбыл ел арасында нағыз ақын ретінде танылады. Ақындық өнер сайысында Жамбылдың алғаш үлкен табыстарға жетуі де осы кез.

— Маған өлең анық жиырма жасымда қона бастады. Бір күні Жетісай жайлайында жылқы бағып жүріп, тұс көріппін. Тұсімде ақ сақалды қария келіп, «Өлең аласың ба, көген аласың ба?» дегені. Мен өлең деппін. Оянып кетсем тұсім екен, көкірегімді бір толқын кернеп, алқымыма тығылғандай, дереу үйге жетіп домбыраны ала салдым да, онды-солды төгіп-төгіп жіберіп едім, кеудем ашылып орта түскендей болды...— дейді екен Жекеңің өзі де.